



28.juli 2014

UKA 2014/38

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Kalaallisut oqaatsitta qanoq tusagassiutini nukittorsarneqarsinnaanerannik qaffassarneqarsinnaanerannillu siunnersuumik suliaqaqqullugit Inatsisartut aalajangiiffigisassaattut siunnersuut.**

(Inatsisartunut ilaasortaq Mimi Karlsen, Inuit Ataqatigiit)

### **Tunngavilersuut**

Tusagassiutit tassaapput naalaarneqartut atuarneqartartullu pingaarnersaat, taamaammallu oqaatsinik atuineri sunniisarput inuppassuarnut. Tusagassiutini kalaallisut oqaatsit, ilaatigut kukkusut atorneqaraangamik arlaleriarlutik atorneqarsinnaasarput naqqinneqaratik, taamaammallu eqqortuunngikkaluartut atuartunit tusarnaartunilluunniit nalinnginnaasutut isigineqalerlutik atorneqalersinnaasarlutik.

Kalaallisut oqaatsivut pisortatigoortumik oqaaseraagut pingaarnarit. Oqaatsitta ineriartortuarnissaat isumagiuartariaqarparput, atortuarnerisigut oqalunnikkut allannikkullu. Oqaatsitta annertunerusumik atorneqarnermikkut inerikkiartornerunissaat periarfissaqarnerulissaaq. Assersuutigalugu oqaatsinik immikkut ilisimasalimmik atorfeqartitsinikkut allatigulluunniit aaqqiissuteqarnikkut, kalaallisut oqaatsitta tusagassiorfinni eqqortumik atorneqartarnissaat pillugu siunnersuisartussamik ilitersuisartussamillu aqutissiuussisoqarsinnaappat taamaammat tamanna pingaaruteqartuuvoq.

Taamaammat tusagassiutit pisussaaffeqarput oqaatsitsinnik eqqortumik atuissallutik. Tusagassiutit kikkunnut tamanut maligassiuissapput.

Assersuutitut taasinnaavara Islandimi radio RUV atorfeqartitaqarmat Islandimiut oqaasiinut ilisimatumik, tusagassiutini oqaatsit atorneqartut pillugit nakkutilliillunilu siunnersuisinnaasumik.

Nunatsinni assingusumik aaqqiissuussisoqarsinnaappat taamaaliornikkut, soorlu oqaatsinik immikkut ilisimasallip nunatsinni tusagassiutit taakkualu kalaallisut oqaatsitsinnik atuinerat immikkut sammisarilersinnaassagaluarpaa, minnerunngitsumillu oqaatsit atorneqartussat kukkuneqarpallaannginnissaat anguniarumallugu siunnersuillunilu ilitersuisinnaassalluni.

Siunnersuut malillugu Kalaallit Nunatsinni tusagassiorfinni sulisunut pikkorissaasarnissat siunnersuisarnissallu aqutissiuunneqarsinnaanngussapput, soorlu sulisut makku eqqarsaatigalugit: oqaasertalersuisartunut nutserisunullu, tusagassiortunut aammalu tusagassiutini aaqqiissuisunut taamatullu pisortani aammalu suliffeqarfinni namminersortuni tusagassiutilerinermik avammullu tusarliisarnermik suliaqartunut.

### **Pisortanut aningaasaqarnikkut allaffissornikkullu kingunissai.**

Siunnersuutip suliarineqarnissaanut inuup ataatsip ukiup sisamarterutaanut suliarisinnaasaasa nalinganik immikkoortitsiviusariaqassasoq ilimanaateqarpoq, tamannalu aningaasaliissutaareersut iluini pisinnaassalluni.

**Namminersorlutik inuussutissarsiortunut aningaasaqarnikkut allaffissornikkullu kingunissai.**

Soqanngilaq

**Innuttaasunut aningaasaqarnikkut allaffissornikkullu kingunissai.**

Namminersorlutik Oqartussat atorfinitsitsuuppata innuttaasunut allaffissornikkullu aningaasaqarnikkut kinguneqassanngilaq